

U četvrtak otvaranje tuzlanskog aerodroma



Tuzlanski aerodrom u iščekivanju "jače" licence

U početku samo avioni do 100 putnika

Međunarodni aerodrom Tuzla biće otvoren za redovne letove u četvrtak, petoga juna. Aerodrom je dobio licencu/certifikat za petu protupožarnu kategoriju, što je prilaz ili ateriranje aviona NDB kategorije, koja, po licenci, omogućava slijetanje i polijetanje aviona do 100 putnika.

Enver Jukanović, direktor

Međunarodnog aerodroma Tuzla, rekao nam je da oni intenzivno rade da dobiju ILS kategoriju, koja omogućava precizno slijetanje i prihvat aviona sa većim brojem putnika.

Očekuju da će uskoro završiti sve pripreme radove, a licencu za tu kategoriju očekuju do kraja ove godine. V. J.

Uskoro završetak puta Trebinje – Herceg-Novi

Do polovine juna biće završena dionica Petijevići - Meljine, na putnom pravcu Trebinje - Herceg-Novi, saopćeno je iz preduzeća Prijedorputevi, koje je izvođač radova, prenosi Srna.

Šef gradilišta ovog preduzeća Radenko Crnogorac potvrdio je da je još potrebno završiti potporni zid i asfaltirati posljednjih 200 metara.

Puštanjem u upotrebu ove dionice biće izbjegnute oštre krivine, dok će kolovozne trake biti znatno šire, što će omogućiti

lakše mimoilaženje vozila, a tako će biti izbjegnute gužve i zastoji na putu.

Nakon završetka radova kroz Crnu Goru preostalo je da u trebinjskoj opštini bude asfaltirano tri kilometra od Aleksine Međe do Obodine, čime će u potpunosti biti modernizovana najkraći put između BiH i Crnogorskog primorja.

Do završetka dionice od Petijevića do Meljina, saobraćaj će svakodnevno od 7 do 19 sati biti obustavljan, uz povremeno popuštanje vozila.

Misija OSCE

Danas u Sarajevu forum o lakom naoružanju

Misija OSCE-a u BiH bit će domaćin otvorenog foruma o temi malog oružja, lakog naoružanja i municije i njihovog uticaja na maloljetnike, prenosi Fena.

Direktor Odjela za sigurnosnu saradnju Misije OSCE-a brigadni general (u mirovini) Ulrich Heider danas će u amfiteatru Poslovnog centra Unific u Sarajevu održati uvodni govor u vezi sa spomenutom temom, nakon kojeg će se prisutnima obratiti inspektor

za maloljetničku delinkvenciju i predstavnik Ministarstva unutrašnjih poslova FBiH Mićo Letić, te Vesna Ninić, predstavnica Mreže učeničkih vijeća RS-a.

Malo naoružanje često je dominantno sredstvo nasilja u nekonfliktnim društvima, a vlast ima dužnost omogućiti sigurnost i razvoj građanima.

Sve dok je sigurnost zahvaćenog stanovništva i dalje neriješena, negativan utjecaj malog naoružanja će postojati.

Izborni kandidati DNZBiH

Hafeza Sabljaković u trci za načelnicu Cazina

Obradovala me i kandidatura Zibije Muslić- Bibanović za načelnicu Bihaća i nadam se da će ovakvih primjera biti mnogo više u BiH, kazala Sabljaković

Demokratska narodna zajednica BiH odlučila je da za za poziciju načelnika Cazina kandidira ženu. Dr. Hafeza Sabljaković, zastupnica u Zastupničkom domu Parlamenta Federacije BiH, ponosna je da je dobila povjerenje stranke da bude prva žena koja će ući u izbornu utrku za čelnu poziciju izvršne vlasti u Cazinu.

- Vjerujemo da gospođa Sabljaković ima realne šanse da pobijedi protukandidate, kazao je na jučerašnjoj pres-konferenciji DNZ-a glasnogovornik ove stranke Nermin Purić.

„Ponosna sam što su mi stranačke kolege ukazale povjere-



Hafeza Sabljaković: Puna podrška matične stranke

nje. Raduje me činjenica da su u dvije najveće općine Unsko-sanskog kantona (USK) kandidirane žene. Obradovala me i kandidatura Zibije Muslić-Bibanović za načelnicu Bihaća i nadam se da će ovakvih primjera biti mnogo više u BiH. Lično, sigurna sam da ću biti najbolji načelnik kojeg je Cazin dosad imao", kazala je Sabljaković.

DNZBiH u USK-u će imati kanidate za načelnike u dvije općine. U Velikoj Kladuši za drugi mandat borit će se aktualni načelnik Admil Mulalić.

D. Ob.

U Bonu šest zemalja regije potpisalo regionalni sporazum

Zaštita Dinarskog luka

Sve zemlje potpisnice se obavezuju da će čvršće saradivati u zaštiti prirode kao i da će povećati broj zaštićenih područja

Potpisivanjem sporazuma o aktivnostima na provođenju programa rada za zaštićena područja unutar Konvencije o biološkoj raznolikosti, resorni ministri Slovenije, Hrvatske, BiH, Srbije, Crne Gore i Albanije na konferenciji u Bonu potvrdili su početak projekta "Zaštićena područja eko-regije Dinarskog luka", prenosi Srna.

Čvršća saradnja

Eko-regija Dinarskog luka obuhvata cijelo područje koje graniči s istočnim dijelom Jadranskog mora, od Trsta u Italiji do Tirane u Albaniji, a ima za cilj postizanje čvršće saradnje među vladama, međunarodnim tijelima te regionalnim i međunarodnim partnerima u zaštiti prirode.

Potpisujući sporazum o aktivnostima na provođenju programa rada za zaštićena područja, ministri šest država eko-regije Dinarskog luka najavili su niz aktivnosti čijim provođenjem će se zaustaviti gubitak biološke i pejzažne raznolikosti, odnosno obezbijediti održivo korištenje obnovljivih prirodnih dobara kao doprinos globalnim nastojanjima da se zaustavi uništavanje prirodne okoline, dodaje se u saopštenju.

Slovenija se obavezala da će povećati mrežu zaštićenih područja u svom dinarskom dijelu za 2,5 posto i pružiti stručnu pomoć ostalim zemljama po pitanju posebnih tipova za-



BiH je u obavezi da širi napore u zaštiti biološke i pejzažne raznolikosti

štićenih područja, dok će Hrvatska ojačati upravljanje u pet morskih zaštićenih područja i nastaviti aktivnosti na proglašenju dva nova kopnena parka.

Zaštićena područja

Crna Gora će uspostaviti dva kopnena i tri morska parka, te uskladiti svoje propise o zaštiti prirode s onima u Evropskoj uniji, dok se Srbija sporazumom obavezala na osnivanje novog zaštićenog područja i proširenje jednog postojećeg u prekogranični rezervat.

Albanija se sporazumom obavezala da će povećati površinu

svojih zaštićenih područja za najmanje 40.000 hektara.

Potpisujući sporazum u ime BiH, federalni ministar okoline i turizma Nevenko Herceg potvrdio je spremnost i odlučnost BiH da širi napore u zaštiti biološke i pejzažne raznolikosti na nacionalnom i globalnom nivou.

Najavljujući osnivanje tri nova zaštićena područja u centralnom planinskom dijelu, ministar Herceg je naglasio da spremnost BiH za zaustavljanje gubitka biološke i pejzažne raznolikosti nije samo deklarativna jer je Dom naroda Parlamenta FBiH usvojio Zakon o nacionalnom parku Una.